

Headlines

1. उपराज्यपाल मनोज सिन्हा होरें कटड़ा च श्री शंकराचार्य मंदर दा नींह पत्थर रखेआ, इस निर्माण दी परिकल्पना 1960 दे दाहके च कीती गई ही जेड़ी करीब 60 ब'रें बाद मूर्त रूप लैने जा'रदी ऐ।
2. मुखमंत्री उमर अब्दुल्ला होरें अज्ज 13 मुख ते 19 पूरक ग्रांट मंगां चर्चा ते मंजूरी लेई विधानसभा च रक्खियां, जिंदे पर परता कल दित्ता जाह्ग।
3. रणजी ट्रॉफी दे इतिहास च पैहली बारी फाइनल च पुज्जियै जम्मू-कश्मीर दी टीम नै इतिहास रचेआ, उपराज्यपाल, विधानसभा स्पीकर ते मुखमंत्री होरें टीम गी ममारकबाद दित्ती।
4. डोडा दे शिवनोट कल शुरू होने जा'रदी 6मीं राश्ट्री राफिंग चैंपियनशिप लेई सब्बै तयारियां करी लैती गेदियां न।
5. मौसम विभाग दा आखना ऐ कि 26 फरवरी धोड़ी पूरे जम्मू-कश्मीर च मौसम आमतौरा पर खुश्क रौह्ग।

LG-Katra

उपराज्यपाल मनोज सिन्हा होरें अज्ज रियासी जिले दे कटड़ा च श्री शंकराचार्य मंदिर दी नींह रक्खी। मंदर बनाने दा बचार 1960 दे दाहके च कीता गेआ हा। इस मंदर दा मकसद आध्यात्मिक ढांचे ते धार्मिक सैलसफा गी बढ़ावा देना ऐ। आदि शंकराचार्य होरें'गी समर्पित एह मंदर परिसर श्री माता वैश्वो देवी अस्थापन बोर्ड कश त्रिकुटा पहाड़ियें च बनोग। एह परियोजना अस्थापन बोर्ड आसेआ तकरीबन 31.51 करोड़ रपे दी लागत कन्नै पूरा कीता जाह्ग।

अपने दौरे दरान एल.जी होरें रियासी ते आले-दोआले दे आप सहायता समूहें दियें महिला उद्यमियें कन्नै बी गल्लकत्थ कीती ते मकामी लोकें दी रोजी-रूटी गी बढ़ावा देने दे मकसद कन्नै पूजा सामग्री ते प्रसाद दी सलाना खरीद गी 5 करोड़ शा बदाइयै 12 करोड़ रपे करने दी घोशणा कीती।

## CM Grants

मुख्यमंत्री उमर अब्दुल्ला होंरें अज्ज जम्मू-कश्मीर विधानसभा च मुख्य मैहकमे दियें ग्रांट मंगें पर चर्चा ते मंजूरी ताई 13 मंगें ते 19 पूरक मंगा सदन च रक्खियां। इन्दे च बिजली, प्रदेश आबकारी ते टैक्सें, शिक्षा, खेडें, संस्कृति, मेडिकल ते सार्वजनिक सेहत सैलसफा एस.सी, एस.टी, ओ.बी.सी दी भलाई-बेहतरी, पशु पालन ते न्याऽ प्रशासन शामिल न। मिम्बरें बंड ते प्राथमिकताएं पर बचार बमर्श कीता जेडा कल बी जारी रौहग। एहदा मगरा मुख्यमंत्री होर जवाब देडन ते ग्रांट मंगें गी पास करने आस्तै मूंज जवाबी वोट पाए जाडन।



## Itoo-Offsite Campus

शिक्षा मंत्री सकीना इत्तू होंरें अज्ज आखेआ जे सरकार भद्रवाह, किशतवाड़, उधमपुर, रियासी, रामनगर, कठुआ ते पुंछ च जम्मू यूनिवर्सिटी दे चला करदे कैंपसें च ढांचे ते अमले गी बढावा देने पर ध्यान देआ करदी ऐ। मंत्री होंरें अज्ज विधानसभा च विधायक डॉक्टर सुनील भारद्वाज हुंदे आसेआ पुच्छे गेदे इक सोआल दे परते च एहू गल्ल आक्खी। मंत्री होंरें अगगे आखेआ जे जम्मू यूनिवर्सिटी कश अजें यूनिवर्सिटी परिषद थमां मंजूरशुदा 11 कैंपस न जिंदे चा अजें 7 कैंपस भद्रवाह, किशतवाड़, उधमपुर, रामनगर, पुंछ ते कठुआ च चला करदे न।



## Dar Census

ग्रामीण विकास ते पंचैती राज मंत्री जावेद अहमद डार होंरें अज्ज विधानसभा गी दस्सेआ जे सरकार नै मरदमशुमारी 2021 दी प्रक्रिया पूरी होने तगर केंद्र शासित प्रदेश च सब्बे प्रशासनिक इकाइयें दियें हदें गी महदूद करी दित्ता ऐ। अब्दुल मजीद भट्ट हुंदे सोआल ते मीर सैफुल्लाह हुंदे आसेआ पुट्टे गेदे पूरे सोआलें दा परता दिंदे होई मंत्री होंरें आखेआ जे जम्मू-कश्मीर पंचैती राज एक्ट 1989 तैहत पंचैत हल्कें दी नमें सिरेआ पूरी चाल्ली आबादी पर आधारित ऐ ते इसी मरदमशुमारी परेंत गै कीता जाई सकदा ऐ। उनें पंचैत हल्कें दे बरोबर, सामे ते पूरे-पराते विकास लेई सरकार दी बचनबद्धता दोहराई।

## Ranji Semifinal

कल्याणी च खेड्डे गेदे रणजी ट्रॉफी दे सेमीफाइनल च बंगाल दी टीम गी 6 विकेटें कन्नै हराइयै जम्मू-कश्मीर दी टीम नै इतिहास रची दित्ता ऐ। एहू पैहली बारी ऐ कि जम्मू-कश्मीर दी टीम सेमीफाइनल या फाइनल च पुज्जी ऐ। जम्मू-कश्मीर दी टीम नै जित्त लेई लोड्डचदे 126 रन दा लक्ष्य बडे सखल्ले हासल करी लैता जेह्दे च वंशज शर्मा ते 43 ते अब्दुल समद दे 30 रन दा शानदार योगदान रेआ। जिसलै कि तेज गेंदबाज आकिब नबी डार नै बंगाल अीम दे 9 खडारी आउट कीते। जम्मू-कश्मीर दे फाइनल पुज्जने दे इस सफर च टीम दे कप्तान पारस डोगरा रणजी ट्रॉफी च 10 ज्हार कोला मते रन बनाने आह्ले दुए खडारी बनी गेन। उपराज्यपाल मनोज सिन्हा होरें टीम दी इस उपलब्धि लेई सारे खडारिएं ते जम्मू-कश्मीर दे लोकें गी ममारकबाद दित्ती ऐ। मुख्मंत्रि उमर अब्दुल्ला होरें बी इस मौके पर टीम गी शबाशी दिंदे होई सभनें खडारिएं दी सराहना कीती।

जम्मू-कश्मीर विधानसभा दे स्पीकर अब्दुल रहीम राथर होरें सभनें विधायकें कन्नै नमा इतिहास रचने पर जम्मू-कश्मीर दी टीम गी ममारकबाद दित्ती ऐ। आकाशवाणी कन्नै गल्ल करदे होई जम्मू-कश्मीर रणजी क्रिकेट टीम च रेही चुके दे ते जम्मू-कश्मीर दी मजूदा अंडर-16 टीम दे कोच समीर खजूरिया होरें बी इस मौके खुशही प्रगट कीती।

<><><><><><>

## Rafting-Championship

डोडा जिले दे शिवनोत च कल्लै थमां 6मीं राश्ट्री राफ्टिंग चैंपियनशिप दा सरिस्ता कीता जा'रदा ऐ जेह्डी 22 फरवरी धोड़ी जारी रौह्ग। जम्मू-कश्मीर सैलसु विभाग आसेआ जिला प्रशासन डोडा दे सहयोग कन्नै आयोजित कीती जा'रदी इस चैंपियनशिप दा मकसद जम्मू-कश्मीर च चिनाह दरया पर पानी आह्ली खेड्डें ते होरनें साहसिक खेडें दी जम्मू प्रांतै दी समर्था गी उजागर करना ऐ तां जे भविक्ख च बी इस चाल्ली दे आयोजन कीते जान ते मते सैलानी इस बक्खी आकर्षित होन। प्रशासन आसेआ आयोजन गी पूरी चाल्ली सुरक्षत ते बवस्था आह्ले ढंगै सिर तोड़ चाढना यकीनी बनाने लेई लोड्डचदे सब्बै बंदोबस्त करी लैते गेदे न।

<><><><><><>

## KIWG-Bike Rally

जम्मू-कश्मीर खेड परिषद आसेआ अज्ज श्रीनगर च इक बाइक रैली दा सरिस्ता कीता गेआ। एह आयोजन 23 फरवरी थमां शुरू होआ'रदिएं खेलो इंडिया सयालू खेड्डां 2026 दे सिलसिले च कीता गेआ। परिषद दिएं सचिव नुज्हत गुल होरें आखेआ कि इस पैहल दा मकसद खेड्डें गी ते खेड्डें राएं नौजोआनें गी नशे थमां दूर रखना ऐ ते खेड्डें बक्खी आकर्षित करियै नौजोआनें अंदर सेहत, तंदरुस्ती ते इक साफ-सुथरे जीवन लेई प्रेरित करना ऐ।

<><><><><><>

## Social Welfare Poonch

जिला माज कल्याण विभाग पुंछ आसेआ बजुर्गे प्रति सम्मान दे रूपै च अपनी किस्मै दा पैहला-पैहला कार्यक्रम आयोजित कीता गेआ जेहदा मकसद बजुर्गे दिएं दिक्कतें गी सुनना, उंदा हल कडना ते उंदी सेहत, तंदरुस्ती ते सम्मान प्रति लोकें गी जागरूक करना ऐं जिला विकास कमिशनर अशोक कुमार शर्मा होरें कार्यक्रम दा उद्घाटन करदे मौके आखेआ कि समाज च हर इक गी बजुर्गे प्रति मान-सम्मान दी भावना रखदे होई उंदी पेंशन, सेहत सरबंधी समस्याएं ते होरने भलाई-बेहतरी दे कम्में च पेश औने आहली दिक्कतें गी दूर करने च मदद करनी लोड्चदी।

<><><><><><>

## Weather

मौसम विभाग आसेआ दित्ती गेदी जानकारी मुजब औंदी 26 तरीक धोड़ी जम्मू-कश्मीर च मौसम आम तौरा पर खुशक बने रौहने दी तवक्को ऐ पर बिच्च-बिच्च कुसै-कुसै दिन किश टामी थाहरें हल्की बर्फबरी ते कनी कनोन दे असार बी दस्से गेन पर उब्बी किश किश थाहें ते छडे उप्परले पहाड़ी इलाकें च। लोकें गी सलाह दित्ती गेदी ऐ जे कुसै बी सफर पर निकलने कोला पैहले ओहू मौसम विभाग दे निर्देश ते जारी सलाह पर निगाह जरूर मारी लैन।

<><><><><><>